

名

山

藏

名山藏卷之九

臣何喬遠恭輯

典謨記

仁宗昭皇帝

仁宗皇帝御諱高熾太宗嫡長子也以高帝十一年生鳳陽二十八年冊爲燕世子端重沉靜嗜學亡厭時晉秦燕周四世子高帝皆教而試之異日者使分閱衛士帝還奏後問之對曰寒甚士方食高皇帝喜使閱章奏擇其有大體可施行者報命高帝益愛之燕王起靖難帝居守北平堅拒李景隆兵燕王旣爲

皇帝尚以世子守北平既二年召立爲皇太子成祖  
有三子長帝次漢王高煦次趙王高燧趙王幼以聰  
敏愛而漢王用靖難功幾得立爲太子謀奪嫡者數  
矣寺人儼寺人保數爲趙王短太子於成祖成祖遷  
都北京五出塞南京事悉付太子施行晚節多疾小  
人讒構太子幾危者屢宮僚若楊士奇輩者爲太子  
下獄贊善梁潛司訓周冕至死獄中然太子益恭慎  
亦賴士奇寔義夏原吉羽翼之有白曰殿下知讒人  
乎曰吾不知知爲子太子監國遇水旱饑荒軍民失  
所戚焉賑恤之暇與宮僚鄒濟王汝玉徐善述等講

說詩書修詞賦之業日記萬言辭翰竝精車駕崩檢  
木川遺命至太子慟絕強拜受遂命皇太孫迎梓宮  
開平臣民三勸進以八月望日丁巳卽皇帝位大赦  
天下以明年爲洪熙元年命英國公輔掌中軍都督  
府陽武侯祿左安遠侯升右寧陽侯懋前成山侯通  
後曰卿先朝勳舊朕托腹心焉出夏原吉黃淮楊溥  
於獄復其官勞原吉咨以政賜冠帶衣服被褥幃帳  
咸具原吉言臣在繫母喪乞歸葬成服上曰我獨無  
喪卿老成人宜艱難共濟命其家屬護葬兵部驛舟  
有司治葬事復厚賜之置太師太傅太保階正一品

少師少傅少保從一品曰予冲人賴焉亦皇祖之制也遂命蹇義爲少保兼吏部尚書加英國公輔太師皆給二俸陞文淵閣大學士兼翰林院學士楊榮爲太常寺卿金幼孜爲戶部右侍郎俱兼職如故左春坊大學士楊士奇爲禮部左侍郎兼華蓋殿大學士陞黃淮爲通政使兼武英殿大學士榮以下四人者皆掌內制不預所陞職務陞楊溥爲翰林院學士前司經局正字金問爲翰林院修撰賜漢趙二王書曰大行皇帝所遺冠服諸物氣澤存焉啓閱甚痛謹以皂紗衝天帽一黑氈直簷帽一并金釵頂子茄藍間

珊瑚金棗花帽珠一串金相雲鴈犀帶一金相玉穿  
花龍條環一副并紫線條金事件象牙頂鞦花靶鑲  
鐵刀一紵絲羅紗衣各一襲皂鹿皮靴一雙并五絲  
綉抹口襪斜皮靴一雙并襪送賢弟朝夕瞻奉以愆  
哀慕上曰古稱官不必備今冗矣抑復有老病昏懦  
徒怠賢廉心其令在內堂上官在外巡按御史及按  
察司廉察不稱者罷之召漢王高煦赴京九月掌交  
陞都督同知方政與黎利戰又安指揮同知伍雲深  
入死命禮部贈上曰京師數百萬家非山何薪禁  
天壽山接居庸關以東餘聽樵採焉中軍都督府奏

歷事監生七人考吏事稱宜送吏部授官上曰吏事末也士當博古窮經達脩己治人之道其命還學於國子繇科舉進敕掌交趾布政按察司事工部尚書黃福曰卿老成人久勞在外亟驛還副朕延佇參贊交趾軍務兵部尚書陳洽其代之召韓王冲烱襄陵王冲烱及其弟冲燧赴京河溢河南諸縣免今歲稅糧馬革命右都御史王彰都指揮同知李信往撫軍民訪奏利病壬午上大行皇帝仁孝皇后尊諡告郊廟社稷詔天下上曰比年丹漆石青之類所司不究物宜槩徵郡縣郡縣逼迫小民鳩斂金幣詣京師博

易商販乘時射利踊價十倍吏復夤緣自肥計民費  
十百朝廷得十一耳自今計直所產地以官市科斂  
者誅禮部尚書兼太常寺卿呂震奏喪服踰二十七  
日宜易纁如遺詔不許命與六部都察院詳議皆奏  
宜服素冠黑角帶群臣同之上曰可及視朝上仍纁  
英國公輔及諸學士如上服上曰群臣從便朕則不  
忍因歎輔武人也審禮過六卿漢王高煦至京與趙  
王高燧竝厚賜之復賜諸王金幣有差上曰諸叔在  
者無幾諸兄弟惟趙王居京師他皆藩外朕旦夕念  
焉戶部其各益祿米差次之靈璧丞田誠九載考績



名山藏

卷之九

仁宗 記

四

縣人句留上曰民留政可知陞州判官丞靈璧如故  
鳳陽諸縣水沒稼命覈實芻糧悉免之上謂翰林儒  
臣曰比朝野物議何如有利害當興革者悉聞朕朕  
審可否紓民困焉交趾都指揮同知陳忠與賊黎利  
戰死之命禮部厚其恤典諭鴻臚寺曰朕欲聞吏賢  
否四方民休戚方岳來朝卽引見朕親問之左通政  
樂福治水蘇松嘉湖杭常奏六府水沒稼請寬征待  
來年上曰民之艱食來歲匪易令代以鈔布漳河溢  
廣宗縣傷稼賑恤之平江伯瑄言七事賜獎勅命施  
行有言瑄言尋常耳上曰出自武臣所以難也所爲

獎掖導不言者古人蓋買死馬骨上諭兵部今太僕馬增數倍而畿民一夫或畜三匹四匹畢力於此耕桑盡廢其散馬給諸衛所及臨邊戍卒養習之進蹇義爲少傅楊士奇爲少保俱兼職如故楊榮爲太子少傅置謹身殿大學士命兼之金幼孜爲太子少保兼文華殿大學士各賜繩愆糾繆銀圖書一曰卿等事先帝有年又從朕春宮軍國務重須卿協贊或有闕政卿與群臣言之朕尚未從卽此密疏毋憚再三令內外七品以上官各舉通經一人授教職以嚴師而與賢大賚文武群臣十月命光祿寺三日一賜衛

士酒肉以禦冬命蘇松嘉湖等府被火災處今歲秋糧悉折輸布鈔如永樂五年故事石輸布六疋鈔六錠罷兩京戶部行用庫市民間金銀者命民犯笞杖者得輸鈔自贖以通鈔命兵部下各都司督衛所官視天下城池有傾塞者使農隙脩治邊境日脩以衛民於警通州民家火延及山東漕船上曰東民水旱數歲今又厄此其許計糧輸鈔四錠準一石上曰四夷京師尚有館衍聖公來朝僦民舍豈所以崇先師工部其賜宅上曰皇考時數下詔存卹鰥寡郡邑有養濟院比聞居室敝壞肉粟布絮不時給守令漠不

留心禮部令謹視之山東登萊諸郡雨水傷麥命蠲  
蠲米樂二十年所逋二十一年者輸鈔代之自是告  
灾者以爲例四方所上雨澤奏通政使司請送貯給  
事中所上曰祖宗欲前知水旱恤民施政故令奏雨  
澤送給事是終不知也而徒勞州縣上章其封進水  
沒薊平峪徐蕭沛等州縣悉蠲其今年租稅於潛樂  
清饑賑之已酉冊立張皇后壬子立太子封諸子瞻  
浚鄭王瞻墉越王瞻塏襄王瞻烱荆王瞻煥淮王瞻  
澄滕王瞻垧梁王瞻埏衛王命吏部令在京七品在  
外五品以上官及知縣五品以下見任官若軍民訪

舉德性深篤行止端方或材能出衆政績顯著或文學有稱識見優遠者量材擢用蔽賢濫舉罪如律舉後犯贓連坐舉者大理寺奏決囚命府部通政司六科同三法司會審承天門特諭大學士榮士奇幼孜曰比年法司之濫朕未嘗不知所擬大逆不道者往往出羅織先帝數切戒故死刑四五覆奏自今審決重囚卿三人同之寃雖細必聞免遠安王貴燮巴東王貴煊爲庶人諭兵部尚書李慶曰國家養兵必衣糧不乏乃可緩急用之今遠戍者勞動操練者少暇守衛者不得下直月糧五斗殆不足宜如洪武中例

給一石復召戶部尚書郭資曰往年百官軍士扈從於此月五斗可自贍今來作都人有家朕欲倍給卿掌儲不乏否對曰有遂奉詔追封第四子靜樂莊獻王瞻垠爲蘄王諡曰獻戊辰上御西角門罷顧翰林臣曰今日始寒朕與卿等尚凜凜况在邊遂命書勅賜鈔幣於緣邊將士上諭蹇義曰武臣皆封贈祖考文臣少得者君厚其臣必推及父母太祖太宗蓋行之其舉以勵忠孝豈無濫十一月上曰建文中奸臣奸也而皆忠其家屬初發教坊司錦衣衛浣衣局及官匠奴功臣家今有存者可宥爲民還其田土有言

事失當謫戍者亦宥之上曰太學聚教天下士蓋士已成材矣禮部其勅學官嚴誨郡縣諸生必通經有用者乃以貢毋徒取記誦諭戶部尚書夏原吉曰所在州郡奏除荒田租將百姓苦征徭相率轉徙歟抑年饑不給疫癘死亡歟自今一切科徭宜擢節政令不便者令有司條具被灾處守令早奏賑恤稽違者治重罪諭群臣曰朕之非德又屬亮陰嗣位之初首詔求言累月涉旬中外亡幾夫京師首善地民困於下而不得聞弊膠於習而不知革朕甚念焉君臣同體卿等無慮後謹嘉謀嘉猷輔朕不逮諭戶部有當

用人力者毋以耕耘收穫時候農隙論英國公輔兵部尚書慶軍番操者畢農成之先農遣之無廢屯種命兵部遣御史巡察緣邊諸衛稽部曲申號令遂諭都察院曰洪武中差遣御史悉賜衣鈔使自潔正風紀今其如故事論大興宛平二縣官曰朕首罷不急爾京縣也而惠不先朕勅詢民瘼固有知不言亦有欲言不知爾切近民亦何不知而亦不言約三日悉以便不便聞坐視者臯上曰朕聞南京抽分廠舊所積薪及龍江提舉司所積竹木甚富今京師得薪最難與久貯任腐敗何若散民歲用外工部悉鬻之鈔



貫收其昏軟者以便貧家令吏犯罪當罷者民北京  
種田遣監察御史湯榮等十四人分巡天下考察官  
吏諭曰蓋吏有媚上而殃下者有不阿而民悅之者  
有虐刑巧索能集事者有廉潔自守不能弛張者人  
之才器其可概哉夫御史朕耳目也當審詢之勉副  
朕心因人賜鈔二十錠上曰皇考同氣無諸叔諸姑  
親諸叔子已冊封諸姑在南京賚而未名號其加寧  
國懷慶大名南康永嘉含山汝陽寶慶八長公主皆  
爲大長公主戶部益祿焉賜太子賓客戶部尚書郭  
資勅曰卿事我皇祖皇考歷四十年列於六卿可謂

盛矣怨叢而不暇顧害及而不知避忠貞篤實之臣  
也今老矣朕閔強勞特陞太子太師俾卿致仕嗚呼  
念先帝舉義卿時早暮從朕守城最勞苦今命戶部  
免卿戶賦卿歸休強飲食慎醫藥以娛暮齒進蹇義  
少師楊士奇少傅夏原吉少保兼職如舊亦賜原吉  
經筵糾繆圖書頒楊士奇楊榮金幼孜蹇義夏原吉  
誥詞曰卿等先帝舊臣朕方倚自輔朕所行卿朝夕  
共見未善當盡言前代庸主自尊而惡聞過其素所  
親信但容容順旨有良臣不默一再拒亦退絕口我  
君臣深戒之終始同心上遂手益誥曰勿謂崇高而

難入勿以有所從違而或怠士奇等稽首謝上悅靖  
江王府輔國將軍贊侃贊偕來朝班下上顧見之曰  
宗親也其班駙馬都尉次著爲令勅諸將嚴邊諭夏  
原吉曰先帝立屯種法所以省民轉輸足兵食所司  
數以征徭擾之其令天下衛所毋擅差遣屯田軍士  
學士楊溥密疏言事上嘉納賜札獎諭賞綵幣一雙  
寶鈔千貫曰望卿始終如此上爲太子時不悅御史  
舒仲成至是蹇義奏仲成它事上命捕治楊士奇曰  
漢孝景爲太子召衛綰綰稱病及立不譙呵陛下爲  
太子時小人多得罪者今已盡宥更追理令詔書不

實望惜俊良共成王化上悅曰有卿如此朕復何憂  
因降勅獎曰朕慮卿不言卿導朕以仁助朕以德惜  
良俊成王化此欲朕爲唐虞君忠良股肱臣也特賚  
白米十石絲幣二表裏寶鈔二千貫卿其承之愍朕  
忻喜永城縣河溢傷稼免其去年稅糧馬草上御右  
順門諭楊士奇曰近覺群臣助我也或快意行事退  
思方悔外間已進言士奇對曰宋臣富弼有言願不  
以同異爲喜怒不以喜怒爲用舍上曰書不云乎逆  
于汝心必求諸道朕恒念之群臣言閒拂朕意者退  
未嘗不反覆朕言有失亦未嘗不悔士奇對曰改過

不吝成湯所以聖也上曰朕患不知耳不患難改十  
二月上聞建文奸臣齊黃等外親全家戍邊者田畝  
悉荒蕪勅兵部家存一丁於戍所餘放歸上諭吏部  
師儒古稱模範比來國子生大率歷事諸司苟歲月  
圖出身卿等每引選國子監官循資爾不聞舉一道  
德老成之士自今宜慎選禮科給事中黃驥言西域  
賈胡進貢病民事上嘉納之示其奏於禮部尚書震  
曰驥嘗使西域故悉西事卿西人不悉耶悉行之刑  
部都察院奏刑名畢召諭曰朕未嘗敢以喜怒損刑  
法卿等明信莅之如朕一時嫉惡過中更須執正毋

慮乖迂朕不難從善召故兵部尚書金忠子達故吏部尚書許思溫子俊至賜衣食授之官念舊人也上諭楊士奇曰無使大臣怨乎不以郭資歸其謂何朕欲使視之少賜賚焉對曰賚有時盡洪武中有尚書致仕給全俸者資得半給幸甚上悅從之上曰庶官賢否軍民所休戚廷臣朕朝夕知之都布按三司官不盡悉其人或聞其賢否邪正久且忘臣善而君忘之誰自勉不善君忘之誰自戒吏兵二部揭其姓名履歷於西序朕省觀焉諭夏原吉曰稼穡問農絲枲問婦鈔法不通朕商卿兩日未決其問之間閭可榜

通衢許臣民陳所見命戶部馳諭各府州縣凡被災  
田土悉準永樂二十年山東逋租例蠲其糧稅常州  
諸縣水蠲糧稅大理寺右卿弋謙辦事官程富各言  
事皆嘉納之庚申葬大行皇帝于長陵勅禮部下天  
下有司繕治郡邑壇宇歲久傾墊者祭器竝堅潔祭  
物出公帑毋斂於下禮部尚書震請明歲受大朝賀  
不從固請大學士士奇榮幼孜淮言陛下所見是上  
曰山陵甫畢何忍也震曰四方萬國遠觀新主皆欲  
一覩天顏聖孝誠至亦宜勉徇上顧四臣禮過矣皆  
對曰則請無備禮

元年正月壬申朔上朝奉天門群臣行五拜三叩頭  
禮不用樂癸酉召四臣厚賜之曰朝會賴卿同心不  
從震請自今朕有未當卿但直言南京龍山產異芝  
禮部請賀不許勅群臣脩舉職事賜故詹事府少詹  
事鄒濟左春坊左贊善徐善述贈諡有司祠墓歲兩  
祭諭楊士奇曰朕欲別擇端謹之士備顧問其疇咨  
士奇薦翰林侍講王進蘇州人陳繼遂建弘文閣於  
思善門作印章使楊溥掌閣事進佐之命召繼上授  
溥印曰置卿左右非止進學將諮理焉有封事識以  
聞亡何繼至授五經博士

繼字嗣初事母以孝聞有司上其事朝廷使御史廉



之則方隨母抱養行灌偃僕甚恭色若爲樹藝娛親  
者頃母入以壺漿來繼趨而前奉以進母嚙之乃拜  
而飲御史亟以聞上嗟異以爲有禮時衰亂之後經  
術頗廢繼獨稱說先王有所論說不敢立異而於  
疏略皆通究釋其疑滯人稱陳五經爲文  
深嚴有思致揚士奇見而善之以薦於朝復從蹇義  
所舉學錄楊敬以爲編脩訓導何澄以爲給事皆供  
事弘文閣諭兵部先帝聽民間畜馬有司急馬息民  
不暇及私今後畜官馬者令二歲納一駒著爲令丙  
戌大郊祀始奉太祖太宗以配還朝群臣行慶成禮  
詔天下大賜宴勅曰自冬迄今時雪不降來牟未遂  
無如吾農何朕方惕厲自省文武列卿亦懋脩乃職  
贊召和氣欽哉製天元玉曆祥異賦序鏤而賜廷臣

兵部尚書慶言畿內民困牧馬請中原及江南諸大  
省群臣以朝覲至者悉給與一馬騎坐正官牝佐貳  
以下牡太僕苑馬歲課其息虧者同民罰從之已上  
曰審思乃未當使士牧民而責以馬遂罷上曰比令  
廷臣展省則有養祭賓客若往還道里費官俸給日  
用而已計餘貲鮮矣自今一品二品歸者賜鈔五千  
貫三品四品四千貫五品二千貫六品七品千貫八  
品以下皆五百著爲令設繕工官置尚書副以右侍  
郎遣布政使周幹按察使胡槩參政葉春分行應天  
鎮江常蘇松杭嘉湖察民利病賜故左春坊左贊善

兼翰林編脩王汝玉贈諡二月頒制諭及將軍印於  
邊將雲南總兵官太傅黔國公晟佩征南將軍印大  
同總兵官武安侯亨佩征西前將軍印廣西總兵官  
鎮遠侯興祖佩征蠻將軍印遼東總兵官武進伯榮  
佩征虜前將軍印宣府總兵官都督廣佩鎮朔將軍  
印甘肅總兵官都督瓛佩平羌將軍印交趾參將榮  
昌伯智都督政佩征夷副將軍印寧夏參將保定伯  
銘都督懷佩征西將軍印祭太社太稷奉皇祖皇考  
配爲故事贈永樂中死黎利賊者交趾左參政馮貴  
右參政侯保官一級丙辰祭先農耕籍舞陽青河睢

寧三縣饑發縣倉賑之陞國子監祭酒兼翰林侍講  
胡儼爲太子賓客仍兼祭酒予致仕勅賜之總兵官  
太子太保武陽侯薛祿左都督吳誠都督同知高文  
程忠都指揮僉事宮得馬興等追虜勝之特遣太監  
瑛鴻臚寺卿善以酒千餅羊百羴勞軍遂益祿歲祿  
五百石誠文忠歲俸給本色米什之三得興等皆陞  
賚有差丙寅奉皇考皇妣主祔廟三月勅三法司曰  
人命至重卿等毋深文羅織大理職評亦毋畏憚遷  
合書不云乎欽哉欽哉惟刑之恤哉以孝行擢前光  
祿署丞權謹爲大學士贈死交阯者兵部尚書劉儁

宮遣祭賜諡樂亭縣饑發縣倉賑之陝西軍士乏食命戶部給以今歲西運驛督之上思先朝舊勞贈故兵部尚書兼詹事府詹事金忠爲少師北京刑部左侍郎馬京爲少傅兵部右侍郎兼詹事府詹事墨麟爲少保戶部右侍郎王鍾爲太子太保禮部尚書鄭賜左侍郎儀智俱爲太子少師吏部左侍郎許思溫爲本部尚書北京刑部右侍郎楊泰北京行太僕寺少卿孫瑜俱爲戶部尚書前北京布政司參議贈吏部左侍郎成璉兵部左侍郎盧淵俱爲兵部尚書刑部左侍郎盧祥爲刑部尚書工部左侍郎陳壽右侍郎

郎鄭剛北京刑部左侍郎康汝楫通政使司通政使  
賀銀俱爲工部尚書贈應天府丞張執中爲本府尹  
及北京刑部尚書朱濬皆賜諡大學士楊士奇等覆  
奏諡上曰是皆先朝耆舊有德行重厚表裏一致者  
有洵歷艱難始終一心者必旌表之庶幾禮賢厚終  
之道雖然諡定論也勞如賀銀堪贈也而不堪美諡  
予惡諡又不若無益諡者九人任南和連城三縣饑  
發縣倉賑之命外官滿三考者聽給假省親祭祖勅  
曰朕數詔求言冀匡不逮卽位以來臣民上章數百  
計莫不欣然聽納其有未當未嘗加譴問者大理少

卿弋謙言過矯激朕一時不能概之於衷而群臣有  
迎朕意交奏其賣直者朕免謙朝參言者益少未嘗  
不自媿今爾群臣勿戒前事謙出朝參如故黃巖縣  
奏累歲旱澇民多散徙去秋雨水漂民居五百餘家  
溺死八百人命戶部馳恤之諭吏部曰近刑官有賄  
敗或刻深者簡用者亦得辭咎歟自今必擇無畀于  
僉人使魏國公顯宗學于國子諭司業貝泰曰此開  
國元勳後欲其家同國久必令奉法循理孝若忠顯  
宗孤子也加意誨之使長不失其祿位因賜泰鈔幣  
隆平縣民饑柏鄉縣多貯官麥請以貸之上曰饑卽

賑母曰貸詔曰刑以禁暴止邪豈專誅殺哉皇祖律  
令善善長而惡惡短罰之輕重咸適厥中吏比附謬  
妄傳致死罪朕深憫之夫五刑之條莫甚大辟身首  
異處斯已極矣自今有犯死罪當凌遲者依律科決  
餘斬絞罪法司竝勿傳會若朕嫉惡偶過律外用籍  
沒凌遲刑法司再三執奏三不允至于五五不允同  
三公大臣執奏允乃已永爲制文武諸司自今亦不  
許法外用鞭背等法尤不許宮人以絕嗣宮求用者  
絕其祖宗父母幸富貴豈有心事君今有自宮者以  
不孝論人之爲非父子不相謀是以舜罰弗嗣文罪



不孥自今犯謀反大逆者依律連坐餘止其身古之  
盛時采民言資戒警今凶險之徒撫爲誹謗一言涉  
國輒呈此名法吏刻深鍛鍊刑之失中民則無措今  
後告誹謗者一切勿治趙王高燧之國勅諸總兵備  
禦鎮守官常年防虜皆以秋冬春夏則懈虜難常也  
宜謹備之薊泰安平度諸州萊蕪蓬萊新寧諸縣饑  
賑之有自南京來奏事者上召至榻前問民所苦對  
曰過徐見苦買羊毛立罷之以張玉王真姚廣孝朱  
能配饗太宗廟追封玉河間王進諡忠武真寧國公  
加號効忠加贈廣孝爲少師加北京諸司曰行在而

將都南馬復建北京行部及行後軍都督府革繕工  
官事歸於兵部四月有至自南者上問所過民安否  
對曰淮徐山東饑有司急夏稅召問少師蹇義對如  
之遂召楊士奇等令草詔免之併秋糧官買物料一  
切停罷士奇曰請使戶工二部臣與聞之上曰有司  
慮國用必持議不決揀民之窮不可遲疑是時上坐  
西角門命士奇等就西角樓起草士奇草詔曰朕夙  
夜念民弘諮下隱山東諸郡及于淮徐頻歲旱澇今  
秋成未冀民凍餒呻吟流于道路郡縣不畜心父母  
耶可全免今歲夏稅其秋糧減半徵收自今年四月

以來一應收買及科派物件未到官者盡行停罷若實無見物先虛報在官者宥不問不許再科以足其數諸郡縣撫輯安養毋貪刻重困之上曰善立命書詔用璽顧士奇今可語二部矣中官採木四川有貪橫者上召弋謙曰爾爲朕治朕自知爾毋畏陞行在都察院右副都御史賜鈔千貫以行設北京行都察院置右副都御史左僉都御史各一員分盧龍恒南冀北廣平四道大名饑發長垣縣倉濟之嚴鈔法賜皇太子書曰朕惟祖於孫父於子親愛天下莫加焉而推明所以長保富貴壽康之道以期之者聖人之

心也爾朕嫡長子我皇考鞠育提訓隨事示之永樂  
甲辰春親征北虜車駕將發子孫咸在顧爾謂朕古  
之令主盤盂劍几皆有警銘人主之道莫大中正吾  
欲以人主中正四字製寶押師還授爾俾爾勉焉不  
幸賓天今皇太子屬爾謹製爾授爾懋敬之爾敬其  
內以慎其外隆古帝王傳授盡此爾懋敬之河南州  
縣饑賑之昌邑邢臺縣饑驛賑之上曰南土善文北  
土厚重今科舉所進北得什一焉禮部其定議南土  
六之北士四之命皇子謁陵南京就畱守加贈故大  
學士胡廣爲少師賜其家甲寅蹇義夏原吉楊士奇

侍上曰夜見玄象否皆曰未見亦不知上曰士奇當知之紫微垣甚急命矣歎息起明名義士奇至奉天門曰監國二十年構于讒慝心之艱危吾二人共之上賴皇考仁明得以保全言已泣然義士奇亦流涕士奇曰先帝之賜陛下純誠之効今已脫險卽夷陛下自寬上曰卽吾去世後誰知吾三人同心一誠遂賜義士奇勅印各二義印曰蹇忠貞士奇印曰楊貞一皆拜受退蓋踰月而上崩戊午謁長陵已未還宮上曰今民間物視國初直十倍有司市供祀牲犧但準洪武時價民怨神其享其令太常悉準諸時直玉

田縣饑賑之勅諸邊總兵曰軍機欲密文書不可稽  
諸將多掌以幕下武人則泄漏滯誤今各擇文臣一  
人往佐遂以分命戶部郎中子譚等五月諭蹇義曰  
御史當任老成者遽授新進遇事風生以喜怒爲威  
福正直不阿往往被凌辱順比則與爲膠漆自今慎  
選之又曰都御史惟廉清公正乃可倡率尚咨可都  
御史者脩太宗實錄貴池典史金蘭考績父老詣闕  
留陞爲本縣知縣行在翰林侍讀李時勉侍講羅汝  
敬言事上怒使武士擎時勉皆改爲監察御史頃之  
下獄庚辰上不豫召蹇義楊士奇楊榮黃淮至思善

門馳名皇太子辛巳大漸遺詔天下是日上崩未發  
喪沐浴襲奠飯含如禮設几筵宮中朝夕哭上食六  
月辛丑皇太子至乃發喪斂壬寅大斂甲辰成服七  
月巳巳上尊諡曰敬天體道純誠至德弘文欽武章  
聖達孝昭皇帝廟號仁宗九月壬寅葬獻陵

臣喬遠曰帝監國有年明習政事在位雖淺膏澤已  
滲於民矣若其改過不吝痼瘕在身漢文宋仁未足  
方也商高周成間歟東莞陳建云

名山燕卷之十

臣何喬遠恭

典謨記

宣宗章皇帝

宣宗章皇帝御諱瞻琪仁宗嫡長子也生之夕成祖夢高祖授以大圭命曰傳之子孫永世其昌既數歲試之事輒剴決稱旨成祖愛之年十一以從狩北京日侍左右隨事訓教嘗命從過觀田家問所疾苦作務本訓授上上讀書一目數行盡裘皆舉經史百家莫不涉意永樂九年立爲皇太孫三從征胡於馬上



指示胡山川故上自少曉兵略善騎射仁宗卽位冊  
爲皇太子其春以南京地屢震命往撫治上旋不豫  
旣大行宮中秘不發喪以遺命召上顧臣下稍稍聞  
上崩其時漢庶人蓄反謀傳言將要劫群臣或請整  
兵旋或請出聞道上曰君父在上天下歸心豈有他  
虞遂傳詣京師六月己亥朔至蘆溝旣乃聞絕慟左  
右掖聽遺詔行哭入宮門詣梓宮拜哭盡哀頒遺詔  
天下癸卯臣民三勸進庚戌卽皇帝位大赦甲寅聽  
政西角門罷遣內使市物浙江及諸衙門派辦行在  
吏部尚書蹇義言內外官吏先帝時坐罪蒙赦有托

喪而亡者上曰父母之恩竝於天地人至不肖有死其親以潔其身者哉君子不逆詐其宥之鞏昌知府孫亶任滿當去安平丞耿福以冗員當汰民皆詣闕留復亶官就陞福知縣申行豫備倉天下大賚臣民七月己巳上大行皇帝尊諡乙亥尊母后皇太后冊妃胡氏皇后平度州同知王瑞昌邑王簿劉整以冗員當汰耆民詣闕留皆復其官予交趾諸生衣服歲賜旌德教諭林蘇九年考績所教生徒無應舉者免其謫戍追俸封吳成清平伯閏七月下議都督府吏輔興州衛軍瑛所言利病行在禮部尚書呂震曰吏

卒卑不識大體言利病覲用耳上曰蕪蕘之論聖人所繹察當否議行之靖州民詣留故知州張幹仍其官脩仁宗實錄上曰御史考察州縣官欲其任賢退不肖也比聞多信邊言不博訪吏勤職奉公禁暴振廢小人畏之鱗爲刑酷或賊濫可狎侮利之更挽攀是使正人受誣群枉得志也其勅布政司按察司巡按御史嚴覈之交阯清化府黎利作賊圍茶籠州八月魯王肇輝進瑞粟有一莖至二十穗者行在禮部尚書震請賀上曰四方大矣比者畿內水潦奏牘不番民之艱食卽謂瑞應應亦塵魯東隅何以令朕無

夙夕憂不許吳橋民詣闕留其知縣吳原予之行在  
工部奏內供綺羅九千匹當下蘇杭二府織造上曰  
減其半水豁金壇縣租勅曰政在安民安民在守令  
聖帝明君靡不慎此選也朕夙夜孜孜而四方任職  
者率不稱詔書求賢自卽位下之至今胡寥寥耶其  
令內外群臣各舉所知以聞行在禮部右侍郎鄒師  
顏卒不能返殯上曰貧如師顏可嘉也其予之驛舫  
歸抑吾臣之廉者豈一人哉有不幸畢官次者以師  
顏爲故事遣大理寺卿胡槃參政葉春巡視應天浙  
諸郡

胡槃豐城人本姓熊以從母適胡因胡姓未樂  
九年進士國初法至嚴槃出巡視一執法行等

奸宄屏息而亦間有過當諸奸不便日造飛語槩不為動槩對察常出諸譏誦長洲民有馬最者為鄉老疏請曰大人居民上諸譏非宜槩謝之自是重最槩視應天多沒入人產應天人苦之民有豪當簿錄者輒問最最以若為人產聞者卒不應槩卒坐其人罪最未嘗不以為恨也至槩之於困窮興學校給餉足軍抵稅輪逋為民請命民誦德焉右都御史終官復故姓

告卽位孝陵榜武臣恤

軍士九月壬寅葬仁宗皇帝獻陵辛亥祔廟秋雨傷

稼除萊陽蘇松嘉湖諸縣稅糧行在大理寺奏民有

盜殺官馬者坐絞死罪上曰奈何以馬殺民發戍邊

南京都察院奏劫盜四十人當斬上曰其詳審聞前

長清縣薛慎服滿故縣民詣闕請復之吏部尚書蹇

義曰長清有令矣上曰必不如國家置守令以為民

也民欲得令何憚更焉十月思州府通判檀凱九載  
當遷其民詣闕留上曰爵祿所以勸士也古人有三  
優優外官勉治也優小吏養廉也優故老尊德也民  
愛檀凱其優之五品之俸行在刑部大理寺奏決囚  
上命大臣與給事中再讞使無寃著爲令放還緣邊  
軍久練京師已追攝工匠移文在所令明年春暖自  
來赴工十一月嘉定民乞留其丞戴宿鹿邑民乞留  
其知縣鄭郁皆聽行在工部奏造御器當市料上曰  
漢文帝服御幃帳無文繡之飾朕甚慕焉造器物料  
內庫幸不乏其止勅榮昌伯陳智都督方政征交陞

賊黎利十二月大名民奏留其丞賀禎擢爲知縣海寧縣逃民復業者九千一百餘戶免其夏稅勅曰京師庶政所出文武群臣旦夕趨事才智不齊寧無過差其自洪熙元年以前所過犯名悉與湔除俾自新宣德元年春正月丙申朔上釋服視朝奉天門勅曰朕嗣承鴻業惟天惟祖宗付畀夙夜祇敬不敢怠寧茲肇歲改元一新天下祖宗簡任爾文武群臣遺于朕躬爾惟懋哉殫慮勤力用恭乃職不惟賴我國家爾亦有無窮之間將郊上致齋武英殿與群臣習儀殿上以示尚書蹇義等曰祭享之禮莫嚴於此朕敢

不敬丁未郊還謁皇太后御正朝百官行慶成禮博  
野知縣陳哲秩滿民懇留予復任嚴京城捕盜禁二  
月丁丑耕籍三月止諸王選婚於朝令自行國中陳  
智方政討黎利敗績贈交趾人死事土官知府琴彭  
爲布政使益發兵擊之上曰朕初承大統政化未洽  
念自古國家未有不繇民之富庶以享太平亦未有  
不繇其困窮以致禍亂是以夙夜祇畏冀時和而降  
之福也夫民一歲之計在春今春雨頻降可以力畝  
而或阡饑寒或困徭役朕甚慮焉其令郡邑省徭徭  
課農桑貧不給者發倉廩賑貸之復金鑄大城知縣



增俸從六品爲故少師榮國公姚廣孝置墳戶四月  
命成山侯王通佩征夷將軍印充總兵都督馬瑛充  
參將以土兵二萬人征交趾尚書陳洽贊其軍削陳  
智方政爵使立功自贖御製外戚事鑒歷代臣鑒書  
以廉能復暢宣秦安知縣青州饑有司議賑戶部請  
覆覈上曰覈而後賑將求之溝壑其令從便宜行事  
五月命三法司平恕錄獄詔曰樂生惡死人情也交  
趾入職方二載矣數構叛逆以勤王師趨火赴淵豈  
本圖哉良繇有司安輯亡狀詔到交趾官吏所犯無  
大小赦除之黎利潘僚路文律誠悔過爲臣子如初

悉宥罪爵以官交趾軍民賦稅如故它采辦金銀鹽  
鐵諸課悉罷戊申午朝退上舉聶夷中鋤禾詩曰吾  
每誦此敬畏而戚農勅右都御史王彰自良鄉至南  
京視民休戚以所見聞以公勤復故松江知府王子  
威任定鎮國輔國奉國中尉及儀賓品秩六月畿內  
河南蝗命使者驛捕七月嚴鈔禁上曰東民仰麥太  
半久旱不成秋稼未可知可除今年夏稅異時詔書  
所寬卹輒曰已先賦或曰災未甚追徵自若謂信令  
何其命山東有司毋得復擾副朕意焉己酉祔太宗  
皇帝主太廟進封薛貴安順侯八月封右軍都督費

熈崇信伯漢王高煦反樂安上親征獲之以歸更樂  
安州爲武定州作東征記高煦犯乘輿燔之五色雲  
見碭山民乞其故知縣劉伯吉聽十月出行在翰林  
院侍讀李時勉獄復其官南京刑部奏決囚上曰古  
者獄成公卿參聽之行在刑部都察院大理寺其會  
群臣再錄以聞成山侯通擊交趾不利尚書陳洽死  
之饑賑湖廣諸縣十二月以征漢復大軍所過州縣  
畝有蹂者除秋租勅兩京刑部都察院錦衣衛具獄  
狀期以三日聞上曰堯舜之世民不犯成康之時刑  
不用是皆君臣同德故致理如斯之隆也以朕涼寡

民之不孚不敢喜情卿原吉等其勉力匡輔庶幾逮古及上獄上親決其輕罪者命安遠侯柳升爲征虜副將軍保定伯梁銘爲征虜左副將軍出廣西黔國公沐晟爲征南將軍興安伯徐亨爲左副將軍新寧伯譚忠爲右副將軍出雲南領兵七萬會征交趾兵部尚書李慶贊其軍工部尚書黃福再鎮之

二年正月申明屯法勅曰朕仰惟祖宗創守之艱兢惕宵晝遵成憲以撫天下賴天之佑海宇清寧五穀遂成惟吾臣民與共享之特賜百官上元假十日在京軍民飲酒張燈爲故事二月成山侯通擊敗黎利

交陞三月調發官軍四萬八千有奇益征之作西漢循吏諭示大臣四月增置督農官一員於蘇松嘉湖杭屬縣免晉王濟熿爲庶人以陝西不歲止一切買辦五月命陽武侯薛祿爲鎮朔大將軍清平伯吳成爲副總兵禦虜開平上親閱獄遣輕繫復李廣歸善知縣增其祿七月諭三法司曰虐暑朕與卿等深居突處猶畏煩蒸矧繫囚哉若歆毒薰鬱疾病死者虧傷和氣不累陰德耶有應罰役應遣者速簡勘以聞是月也上三閱獄遣輕繫八月陽武侯祿清平伯成破虜獻俘還京資功有差復楊信桐廬知縣增俸從

六品九月安遠侯柳升遇賊死隘留關右參將崔聚  
郎中史安主事陳鏞李宗旺皆死之上曰比聞平陽  
夏秋亢旱稼穡不登他州縣皆不以聞有畏忌乎其  
勅山西布按二司察旱傷所在免其賦令有司加撫  
綏毋使流移封李英會寧伯十月上曰書云萬邦黎  
獻共惟帝臣惟帝時舉詔書求賢朕日夜寤寐之天  
下之士豈無伊尹傳說諸葛孔明者率未見也比一  
二大臣所薦舉授事未久賄于貪饕或曠諸鄙朕何  
賴焉進賢退不肖卿蹇義尚慎職事以副朕志以天  
氣嚮寒命三法司簡輕囚上親閱狀出之旱蠲卹山

東陝諸縣十一月交趾賊黎利奉表請立陳氏後成  
山侯通等不請命盟利而退師詔曰安南疆於海界  
衣冠君長不屬股肱大明受命其國王陳日燧恭天  
之威首先百蠻歸誠我太祖高皇帝逮于後嗣一心  
終始賊臣黎季犛父子稔惡殺君篡國屠宗交人靡  
告我太宗文皇帝愍其覆絕出師致討生擒兇渠求  
故王後立之屬族逃竄歷久弗獲乃割制爲郡縣吏  
撫綏之吏不得人致其弗靖以塵王師冒露寒暑朕  
忍一隅獨淪墊溺交人思陳之先曰其遺孤鬻尚存  
僉爲請命甚契朕所以奉承祖宗存亡繼絕意交趾

吏民無小大罪皆赦之安南耆老具壽實以聞冊封  
朝貢如洪武中故事成山侯通等所置文武官吏皆  
班師解職還京以寒氣至休百工乙未皇子生大赦  
天下十二月申明捕盜法陝西旱命有司開倉賑濟  
出絹五萬匹綿布十萬匹給其尤艱食者止一切科

徵作書媿詩示行在戶部尚書夏原吉

詩曰關中歲  
屢歉民食無

所資郡縣既上言能不軫恤之周禮十二政散貨首  
所宜給帛遣使者發廩飭有司臨軒戒將命道往毋  
遲遲命下苟或後施濟安所期吾聞有道鎮守浙江  
世民免寒與饑備已不遑寧因情書媿辭

太監裴可立奏按察使林碩阻格詔書命逮之既至

上曰但實對毋怖碩對臣往爲御史按浙小人不便



臣今至官未久又慮不便故以謬語太監臣於太監無乖忤也上曰朕固未信逮爾面問今白矣可馳驛

之官

林碩閩縣人弱冠登永樂壬辰進士丰儀凝聳成祖親擢為侍御史嘗劾蜀王不法上嘉其直

書名御屏巡按浙江勅漕運蘭侍郎縱恣執法不同奸邪側目滿考擢浙按察使時湯千戶者倚鎮守裴太監要迫郡縣魚肉百姓碩禁之湯懼喉太監奏碩既遠間得白馳驛之官碩被逮日其妻與其繼母亦逮至茶洋飛詔釋之遂降勅切責可立碩益感奮飭風紀道亂略計擒賊賊史慶真虛宗琦等散其黨直寬七十餘家秩滿士民上章乞留碩以繼母老固請終養歸正統初起為廣東左布政未赴而卒

三年正月元夕賜文武遊臣觀燈萬歲山賜宴文臣賦詩以獻賜之鈔二月名皇長子戊午立為皇太子

丁卯奉皇太后遊西苑上壽萬歲山獻詩頌德勅三

法司慎刑復北流知縣李植黃巖知縣劉道成進祿  
一級上曰欲福吾民急在諸郡得良守耳吏部奏御  
史靜御史旭御史克敏御史麟考最九載當授方面  
官可悉遷知府御製帝訓二十五篇

君德奉天法祖  
正家睦親

經國勤政恭儉戒傲用賢知人去邪防微求言祭  
祀重農興學賞罰黜陟刑文治武備馭夷保生

三月胡皇后遜居別宮立貴妃孫氏爲后諭行在吏戶  
禮工四部五軍都督府錦衣諸衛指揮使司各勅以  
職任四月作曹參守法論閏月閱獄遣輕罪山西饑  
禁逐流民以擅盟黎利退師下成山侯通與都督馬  
瑛爲事官陳智李安方政布政使弋謙等獄籍其家

五月以臯獄頌繫刑部尚書金純上親閱狀遣其輕  
罪者山西民饑徙勸賑於富民交陞黎利言陳暘死  
亡後遣行在工部右侍郎羅汝敬詰責之再訪以聞  
恤死賊諸臣後免汝南王有燠新安王有熹爲庶人  
作酒諭訓百官上閱罪出輕囚六月太原大同遼沁  
汾諸州縣旱上曰郡縣告饑者衆朕發廩勸分無敢  
後其令有司熟講救荒政七月以通政使顧佐爲行  
在都察院右都御史八月皇子祁鈺生龍陽武陵水  
恤之丁未田而視兵於邊次三河見三河令曰三河  
不善撫我民九月庚戌朔至薊薊歲上曰安得它郡

縣歲如薊愨其吏曰故漁陽郡也張堪爲之樂不可  
支辛亥至喜峰口兀良哈從萬人寇寬河上以鐵騎  
三千征之親射其前鋒三人兀良哈望見黃龍之旗  
皆拜丙辰斬其酋渠擣穴搜山戊午享諸將會州製  
歌勞士壬戌駐蹕鐵將軍店解俘飲食之忠勇王金  
忠都督把台獲虜及馬牛羊至飲而賜之金罍旣班  
師上射虎喜峰中之癸酉還京十月上曰古者師保  
之職論道經邦不煩以政少師義少傅士奇少保原  
吉太子少傅榮皆我祖宗簡在臣黃髮彌亮尚治有  
司非朕優眷老成意可各輟所務朝夕朕側討論至

理用寧家邦職名俸祿悉如故上聽儒臣講春秋賜坐啜茗雪賦喜雪詩罷遣衛土工役七月以上者十一月收繫指揮鍾法保請採珠東莞者上曰風氣夜寒邊士可念也守瞭關墩者毛襖狐帽急予之弊者易以新十二月澤沁永蒲靈石及平陽諸州縣霜殺菽命速賑毋留

四年正月上諭翰林學士楊溥曰滄海之大江河助之古君臣更相戒飭所以致理稱良也輔德陳過卿等勉之毋諛勅行在三法司刑罰所以輔治罪惡重者極典不原也有詿誤于連朕夙夜在心欲與之求

情其令雜犯死罪以下得贖米二月騶虞二見來安  
止賀勅曰五刑之屬三千莫大不孝有烝父妾叔兄  
弟妻者送京師治之武臣及子弟犯者失職毋襲著  
爲令進封金忠清平伯吳成清平侯孫忠會昌伯以  
著民乞留加鞏昌知府孫亶潼川州知州趙顯宗昌  
黎知縣楊僖文水縣丞徐文襄垣主簿喬育俸四月  
薦鱗魚奉先殿分嘗大學士士奇榮幼孜賜酒製詩  
士奇等和上曰今日君臣當以卷阿相勗五月上親  
決獄遣輕罪止捉辦科買勅曰吏不得人受賕縱奸  
民之不平求伸布政按察二司及巡按御史二司御

史又多非是枉直或禁斃之所以赴闕競衆而京師  
繁刑夫理民之道宜使有罪不逃誅無罪不遭抑今  
小民越訴京師不恤死也何以張官爲其易心滌過  
鉏奸植良毋使豪右肆虐朝廷受怨名於下製典謨  
詩七月廣東進白鳥二幸文淵閣賜少傅士奇等鈔  
有差九月申明栽種桑棗今勅朝鮮國王楸曰王聞  
者薦其遠誠海青鷹犬不以實苑囿遣使來獻使還  
荅王陶器十五几王國誠多怪獸珍禽然非朕所畜  
幸自今已之十月幸文淵閣顧問少傅士奇學士溥  
等賜酒饌製詩上作猗蘭操

蘭生幽谷今辨其芳  
賢人在野今其道則光

嗚蘭之茂今參尊爲伍  
所應賢人兮予求汝籍

以示大臣曰孔子自衛反魯

而操猗蘭傷不遇也朕虞谷中之賢有不仕者輒擬  
斯篇夫以人事君卿等所謂大臣也幸文淵閣賜儒  
臣鈔及御書製詩一章上曰朝鮮僻遠小國朝貢使  
數至貢率用金銀力豈能辦哉且非其產也諭其國  
王地以土物獻明使至王國中飲食之足矣毋有所  
遺與乙未獵峪口十一月以耆民乞留復揚州知府  
陳眞鳳翔同知耿寬許州判官王通保安知縣張庸  
休寧知縣莫魯任皆增祿一級十二月朔霜寒甚命  
光祿賜在廷文臣羊酒曰皇祖考時且嘗有賜朕今



忘之追免鳳陽及京師裏八府水災田賦

五年正月丁未雪作喜雪歌二月庚辰萬壽節賜群

臣宴爲故事罷遣工匠老幼殘疾者勅行在工部左

侍郎許廓巡撫河南并賜詩

河南百州縣七郡所分治前歲農事缺旱澇始

復繼衣食既無資民生曷繇遂顧予位民上日夕懷憂媿爾有敦厚資其往勤撫字徒者必輯緩饑者必賑濟咨詢必周履毋憚躬勤勸虛文徒瑣碎所至見實惠勉旃聲乃誠庶用副予意

武三十二年鄉舉宣德六年代張本爲兵部尚書本嚴厲詳密耶承其後濟以寬大

罷採木軍

夫遣歸農勅曰朕孜孜圖治食念人饑衣念人寒今

春氣已和民瘼未舒懼非所以膺天承祖宗特頒寬

恤之令盡朕審思所至者水旱蝗蝻地速視其灾以

詔賦聞蠲免三年以前芻薪之稅招饑徙民復業免  
役一年所毋責償倒死官馬驢騾及虧欠孳生馬匹  
者停止採買顏料生漆諸物爲營造監採監買吏召  
還之上供物非上產毋徵徵所產土除他役起科官  
田二斗以上者減十之二四斗至石以上者減十之  
三戶有二人役工匠者一人歸四人者二人歸一人  
者聽合於他戶一歲二歲相更役年老殘疾悉放免  
之贓汚士之極醜理官上罪必核毋辱人終身以清  
明節奉皇太后上陵上橐鞬導騎步掖過河橋三月  
辛丑朔雨製皇陵春雨詩警邊閱馬親割鮮上皇太

后頒文武大臣乃自御及節奉皇太后祭陵賜從官  
豆粥獻大德頌於太后戊申上省農道中三推其耒  
耜農人皆呼萬歲賜鈔六十遂徧賜道旁諸農家作  
賞春賦乙卯策舉人詔等奉天門賦策士歌以耆民  
乞畱增河間通判段準祿增置秀水嘉善桐鄉平湖  
四縣選庶吉士薩琦等八人讀書翰林給賜如永樂  
故事加役隸四月命陽武侯祿豐城侯賢等築獨石  
雲州赤城鵬鶚堡賜之出車之詩五月追奪賊吏誥  
勅著爲令以耆民乞畱增獲鹿知縣吳韞巢縣主簿  
范永祿置雲南廣邑州郡守闕命擢舉京官廉能者

不以次遂賜况鍾等九人勅及傳六月勅許廓蠲河  
南三年以前逃民逋租獨石雲州赤城鷓鴣城堡成  
遂棄開平免易涑水復業逃民九百九十五戶賦遣  
太監鄭和持詔諭諸番遣捕蝗畿內命行在戶部尚  
書郭敦曰往歲捕蝗之使聞不減蝗卿尚飭而後遣

之因製捕蝗詩示敦

詩曰蝗蝻雖微物爲患良不細  
其生實蕃滋殄滅端匪易方秋

禾黍成荒元各生遂所忻歲將登奄忽蝗已至害苗  
及根節而况葉與穗傷哉隴畝植民命之所係一旦  
盡於斯何以卒年歲上帝仁下民詎非人所致修省  
弗敢怠民患可坐視去螟古有詩捕蝗亦有使除患  
與養惠昔人論已備拯民於水火勗哉勿玩愒郭  
敦堂邑人洪武中以鄉舉歷官衢州知府有惠政合  
內蠶箔嘗有蠶絲類織或蠶革帶修廣適度鄙人謂  
敦仁應坐累徵詣京師耆老赴闕乞留再起監察御

史宣德中歷戶部尚書廉慎公直屏絕私

鳴雖官六卿泊然布素人稱焉行君子 設雲南騰

衝州七月嘉禾產太廟側止賀以耆民乞畱復嵩縣  
知縣吳祥任增其祿別守令賢否八月己巳朔日當  
食陰雨不見禮部尚書澆請賀不許九月歲登賜群  
臣詩命諸學士和免易州復業民千二百二十九戶  
唐縣復業民二百九十五戶維縣復業民三千四百  
七戶稅糧有差增廣平府通判白亨祿乙卯巡近郊  
已未還十月丙子閱邊丁丑駐蹕龍虎臺召英國公  
輔成國公勇尚書義學士士奇榮幼孜溥等至幄中  
論政酌之酒己卯獵居庸進鮮太后遂燒荒癸未見

宣府總兵譚廣於泥河賜綺紗乙酉視師洗馬林師  
整上悅勞將帥丁卯獵戊子回鑾命都督義仍獵以  
警虜壬辰還京遣副都御史賈諒巡視江西利病十  
一月沅陵虎上曰能使渡河者何人也勅其守令脩  
政十二月己卯雪尺作喜雪詩賜群臣宴群臣進和  
語有儆戒者上錄而爲之序因臨刑擊登聞鼓訴冤  
命書其情詞進著爲令丁亥含譽星見凡旬有五日  
乃減增高州通判周義乾州知州賈麟祿閏月上曰  
惠民無實謂詔書何間者郡縣數水旱民賦未充有  
司迫逼至于逋逃其許以鈔絹布代准民間直收之

自三年以前者上曰民七十以上及廢疾者一子侍  
詔書也諸衛所勾軍豈無父母老疾家獨子有司其  
覈而傳之近地

六年正月以湖廣旱罷採木免安邑復業民三千七  
十一戶元年二年稅糧萬七千有奇二月作招隱詩  
求賢增扶風知縣宋端許州知縣魏儀貴溪知縣徐  
士宗祿二級下御史陳祚獄三月增設府縣佐貳官  
尊撫逃民雨製喜雨詩五月以耆民乞留起復况鍾  
蘇州知府韓福鳳翔知府六月黎利再奏陳晷死命  
刑署安南國事製憫農詩示吏部尚書郭璉曰爲朕

慎擇賢守令

詩曰農苦國所重八政之本源辛酉事耕作憂勞巨晨昏盡年僅能給歡歲安

可論既無糶數肥安得繼絮溫恭惟祖宗法周悉今且存退遜同一視覆育如乾坤當與古循吏卓有父母恩惟當慎所擇庶用安恭元

免開州逃民五年秋糧八百九十五

戶再作招隱詩七月上閱獄因遣輕罪夜幸楊士奇

第八月勅和寧王阿魯台曰王自朕嗣位以來篤于

闕下貢使接踵聞者聞王困瓦剌脫歡避之南徙朕

深憫惻尚念邊將恐驚王部落王乃風聞朕將發兵

乘王弊王在危難朕不救援烏有利人之灾迫之於

險者哉茲遣都指揮昌英諭朕意王毋疑焉增平南

知縣徐彥麟祿浚白塔河十月丙午巡近郊以耆民



乙留復裕州知州石鼎通州知州王瑀長垣知縣焦

昉任增其祿十一月作祖德詩九章

其一章曰上天信崇高臨下明

以赫元季政昏亂帝用厥夷狄眷求令德宗視乃善  
慶積沛然啓其祥繼宇俾開闢其二章曰恭惟我仁  
祖躬備大聖德天性稟純粹溫恭而允塞焉志在仁  
義兼亦貴稼穡備寶玉之所藏山川被光澤其三章曰  
維時屬邁屯猷獻之自適進退與道俱玉德懷貞白  
皇天鑒昭睇寶命所繇錫篤生太祖聖配天立人極  
其四章曰海內如鼎沸土壤分割析蒼生靡怙恃俛  
伏齏毒螫仗劍起涼梁奉天極焚溺再駕定東南一  
舉下西北其五章曰曠哉六合內腥穢悉蕪除三光  
復宣朗五典重脩飾遠齊堯舜功近過湯武績遂今  
普天下休養樂生息具六章曰太宗剏外同經統奠  
宗祏聖文既炳煥神武尤赫矣賢才盡登用秉德各  
脩職庶邦承覆載貢獻來九譯其七章曰昭考撫盈  
成至仁弘隱測民安視如傷恭己臨萬國繼志與述  
事夙夜懷茲惕皇風益清穆皇道寔正直其人章曰  
正本所自隆仁祖實啓迪祥源深且廣天派肆洋溢

聖神紹傳序茂衍萬世曆造尙本玄王興周美后  
其九章曰茲予嗣鴻業時幾謹中飭四聖赫在天悠  
久除法式保佑頌深春負荷媿餘力稽首陳咏歌庶用示無致趣工部頒邊軍裘帽  
勅曰上帝之德好生而已寒嚴囹圄中有可憫者三  
法司錦衣衛速從輕斷若當體勤待對出之母淹十  
二月太監袁琦以採辦爲名私遣其黨巨隊等十人  
虐斂於廣東凌遲之太監唐受虐斂於南京梟首南  
京市誠內官內使毋怙寵作威免大名廣平真定河  
閒徐諸縣水災田糧及長沙縣復業民稅糧千六百  
七十七戶以吏民乞留復鳳陽通判劉釗長安知縣  
竇文莊任增其祿

七年正月辛酉朔日食勅群臣謹天戒命刑部都察院觀政進士分鞠獄囚二月免長子縣逃民五百三十三戶二年至六年稅糧上親閱獄遣輕罪戊戌有事大社大稷雨賦甘雨歌令衍聖公孔彥縉傳而觀三月上諭禮部尚書濙曰朕聞者以官田賦重百姓苦之詔減十之三聞戶部多不遵守甚者與有司期陰爲慢格令闕恩何等咎也因賦減租詩詩曰官租昔蓋有因而此服田者本皆貧下民耕作既勞勤輸納亦苦辛遂令衣食微曷以賑其身嚴念惻予懷故述安得循下詔減十三行之四方均先王親萬姓有若父子親茲惟重那本日於斯人四月以山西旱免其逋賦二百四十五萬四千八百石屯留

縣疾風震雷雨殺麥以河間吏民乞留其同知莫壽  
陞爲知府五月龍駒出山西上曰西之不歲繼踵告  
災一獸之異足活民耶群臣欲表賀可止之六月上  
閱獄狀遣輕罪命強盜死獄中者勿斬首勅曰朕選  
能任賢命以恤綏頒璽書數矣曩爲所任匪人使百  
姓栖栖棄鄉離土朕甚憫焉已遣人招撫復業免徭  
役一年所今聞有司不體朕心如故流民歸者居無  
廬舍耕無穀種逼償故所逋奈何不死且復亡也其  
速加厚恤諸雜賦蠲除之有虐害者無官民悉治罪  
六月罷內官入番買馬製官箴三十五篇做有位增

河間知縣徐岳蓬萊知縣朱輔祿七月免揚秦水災  
田租二萬二千九百三十餘石賦幽風圖詩揭便殿  
八月勅曰朕思得賢才共圖治理寢食念之今朝臣  
三品以上舉爾所知復賦招隱倚蘭告之朕意近惟  
少傅士奇薦舉交趾南靈州知州黎恬吏部員外郎  
魏驥等諸臣曠旬積月無一人焉巖藪窟穴豈皆虛  
哉吏部其會三品以上官推擇才行文學之士方面  
有司昏懦貪暴者與都察院奏黜之因遷擢驥等十  
九人官有差

黎恬清江人以進士擢御史與同列上  
章力詆大臣因薦知南靈州黎利及恬

北歸至是以薦陞入翰林官至右春坊右諭德正統  
初卒士奇辭恬在內為良御史在外為良郎守云

嘉禾嘉瓜出陝西皆止賀勅邊將嚴邊置濟農倉蘇州九月上賦織婦詞十二月以耆民乞留增泗州知州石佩會同知縣張恕陽信知縣張純沅陵知縣張鼎新祿

八年正月丁丑祀南郊還朝群臣行慶成禮戊辰大宴故事先郊朝上止朝詣郊既至視牲品飭太常其夕雪霽及還宮既慶成內臣請張燈如故事上曰明當宴百官母以樂散敬二月賑河南饑郵使者上閱獄狀遣輕罪二月命民越訴不實者發戍邊選庶吉士尹昌等三十八讀書翰林製養士詩命內外恤軍

士四月脩廣寒清暑二殿藏書其中奉皇太后遊宴

焉製廣寒殿記

記曰北京萬歲山在宮城西北隅周迴數里崇岱之積疊奇石巍然于

左右二道宛轉而上步躡屨息乃造其巔飛樓複閣

巔亭危榭東西拱向頽仰輝映不可殫紀最廣者為

廣寒殿崇棟飛檐金鏤玉砌重丹疊翠五紵煥焉鞞

雲霞納日月北枕居庸東挹滄海西挾太行高岱並

前大河橫中俯視江淮一目無際寰中之勝繁天下

之偉觀也永樂中朕嘗侍皇祖太宗皇帝燕遊於此

天顏悅澤指顧諭朕曰此古軒轅所都而趙宋疆境

也宋弗良金耶而都之金又帝良元瓦而都之厥亦

後裔不念儀殿天命我高皇帝吊伐誕安簡我與茲

我不敢康建文嗣位信用奸回朕對宗室茲城孤立

殆一髮矣諒天之靈克清奸慝以有今日又顧茲山

諒朕曰宋之良嶽也不振以是金不戒而徙茲元又

不戒而加多焉夏書所謂浚宇擊塗者也諱吾若采

就國汰侈存弊時資遊燕以垂鑒儆汝其識之朕指

首受命書不云皇祖有訓詩不云乎儀刑文王敬以

所授大調勸諸金石既賜群臣遊西苑命乘輿馬以  
以自者亦以示我子孫賜群臣遊西苑命乘輿馬以  
入詔曰朕以菲德恭嗣天位夙夜圖惟所安利元元  
兩畿內及河南山東西自春徂夏旱饑相仍朕甚惻  
焉上天降災厥有攸自政闕歟刑失歟斂繁歟不治  
官歟永念其咎內疚於心其令七年以前所逋稅糧  
鹽屯皆停徵六年以前所逋課程買辦採造諸色物  
軍衛有司所採運炭葦草束皆免之被災家免役一  
歲所追徵稅課鈔倍者免五年以前乏食軍民在所  
官司驗廩之非犯十惡罪罪並寬一等逃軍逃匠有  
自首者原之三司府州縣連名舉賢良方正一人聞



按察司奏治有司貪酷害民者御史奏治按察司比  
歲所增設撫民官欲知民所苦也朕殊不聞其一言  
令悉還朝如故他簡冗者別與叙用凡爾文武大臣  
竝受付託宜同朕休戚詔到恪行之毋慢五月選幼  
軍侍東宮六月旱蠲兩畿山東西河南屬縣租稅作

憫旱詩

詩曰亢陽久不雨夏景將及終禾稼紛欲槁望霓切三農祠神既無益老壯憂仲仲

得不盡何以至歲窮予為兆民主所憂與民同仰首  
瞻紫雲在天橫精衷天德在發育豈忍民瘼痛施霖  
貴及早其必昭感通勉

跋望有濟冀以蘇疲瘵勅三法司曰比命疏理獄囚

念炎暑也旬日矣寂不奏謂朕虛文耶當死罪者長

繫之餘期以五日遣須質理者聽保領存在毋遲馳

諭中外具如勅七月置武騎騰驤四衛八月上日聖  
人用兵皆不得已不以小寇動衆比者雲南摩沙勒  
刀甕作亂黔國公沐晟請討非朕意其先遣人撫諭  
之不服乃兵期得刀甕卽已久任扶風典史楊清增  
其祿戊午景星見止賀慶王榭進瑞麥瓦刺順寧王  
脫歡遣使來朝廷臣言明使者三入瓦刺皆未返宜  
罰之上曰尤而效焉非禮也勅曰明三使人於王矣  
皆未返我國家撫遠甚厚王亦効誠意阻於道路乎  
使歸遣之九月勅曰朕體好生夙夜念刑庶幾欽哉  
之義三法司取決重囚憑章耳安得察顏色吏廉明

者分遣饑囚宥覆不厭其心者識之毋輕率在死人  
增吳縣知縣賈忠祿

九年二月再頒兩畿河南山東西寬旱詔製思賢詩  
三月增鎮遠通判王鑑祿以水旱賑常揚徐順德保  
安登州諸屬縣四月勅曰朕夙夜弗遑天與祖宗之  
心惟匹夫匹婦允懷保之凡選賢才寬徭賦賑窮荒  
宥罪過卿等宜端慎脩職篤行以體朕志上閱獄大  
貸四五月命瘞露屍上曰朝廷優恤軍士贍以衣食  
使感恩而勇公戰也比聞官旗吏胥率侵牟其月糧  
布絮主者或夤緣下鄉以其糧絮易賄充饋送則蛇

系也欲便按法行誅謂朕不教而殺自今都察院申  
嚴犯者死家戍邊六月免涿文安鉅鹿二十餘縣七  
八年水旱地租青萊揚州江浦永平廣平河間平陽  
霍諸府州縣稅糧有差七月兩畿山東河南諸郡縣  
蝗覆地尺遣驛捕雨寬畿內諸縣秋租阿台朶兒只  
伯失捏干等謀掠涼甘肅有款者都督廣請拒之勅  
曰虜人多詐其天性虎狼蛇蝎大造豈以息生生哉  
虜款者處之甘肅徐察其向背與爲兩端飭備而已  
增邵武知縣鄒良鉛山知縣孫珏祿八月命水旱蝗  
蝻之處軍民孳牧及乘操馬虧斃者悉免償復勅巡

撫侍郎巡按御史躬視之免今年秋糧屯糧十之四  
止工部派辦物料卽不被灾郡縣亦從緩輸毋得逼  
追凡刺瀕寧王脫歡遣使入朝告殺阿魯台請獻前  
代玉璽止之勅曰比北虜降者皆言阿魯台已爲瓦  
刺所殺部屬分散有渡河依邊者朕憫其失所亦慮  
困窮或鼠竊其令總兵官嚴邊堠善待其歸附者朝  
廷且處之善地與官職俸賜上親試翰林院脩撰馬  
愉等三十七人第其等賜賚有差畿內陝西四川水  
揚鎮江蘇松常湖廣浙江江西諸州縣旱皆傳恤之  
九月癸未上巡邊出居庸至懷來萬全見故和寧王

阿魯台子阿十只俺朝使諸將請因獵掩虜不許十月丙午還京權署安南國事黎利卒命其子麟襲虜寇涼州總兵官劉廣追擊之不及還勅曰今西北胡虜敗者離散勝者驕縱當嚴兵保境寇來則戰去勿追之以旱灾行寬恤今富陽知縣吳堂致仕民詣闕乞留許之

吳堂東平人永樂辛丑進士初知富順除治奸暴求知富陽以官官三事冠僚

能共成之給楊震四知圖以自厭以介特不阿與郡使不合翻然解去民乞留得旨權然如再見父母堂治富陽九年宿弊盡釐訟牒稱簡紀去民泣送之十一月故和寧王阿魯台

部落把等率家屬來歸十二月命阿十只俺爲中軍左都督賜第宅諭尚書胡濙曰水旱饑癘四方薦告

天災頻仍民何以堪朕深憂懼卿等勉圖匡濟有可  
回天拯民者其悉以聞製洪範序

十年正月乙亥上崩遺詔皇太子嗣皇帝諸王宗室  
悉遵祖訓謹守藩嗣君幼國家幾務文武大臣白兩  
宮乃行喪禮日易月悉如皇考洪熙元年五月遺詔  
無改山陵掌軍兵及守土吏毋自臨闕丁酉上尊諡  
曰憲天崇道英明神聖欽文昭武寬仁純孝章皇帝  
廟號宣宗六月辛酉葬景陵

臣喬遠曰高皇帝承胡元縱弛之弊宏振威武以做  
天下成祖以英達之資纘緒大服海內竦然振厲者

五十餘年昭皇帝至德深仁不久於位章帝繼之乃  
涇濡以醇懿陶埴以德義聞四方有水旱蝗虫之灾  
憂形於色遣人賑揀如恐不及隆寒盛暑先下法司  
蘇洗冤獄奏上刑名垂神省察竝從輕典優禮老成  
勳舊具有終始寤寐思賢內自廷臣外及方岳郡守  
谷簡詳擇不以輕畀褒獎循良使久於官是以在任  
之人奇才異能皆極一時之選至有文學胥史裒然  
濯被致位名卿十年之內吏稱民安比於文景下及  
民間木植器用莫不精堅殊倫亦可以見一時無些  
窳偷惰之風矣至夫郊廟之禮必躬必親奉事太后



祇敬夙夜宮中欲用一木架工匠飾繪金綵輒命易  
之嘗命侍臣遊東苑指草舍一區曰此朕致齊之所  
雖不敢上比茅茨庶幾不忘儉德未嘗一日去書下  
筆蠶涌皆傳脩齊治平之道翰墨圖畫隨意所在盡  
極精妙歲秋冬巡邊閱武親橐鞬騎射威震乎殊俗  
休矣哉文武恭儉之主也